

Date – 09/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Union Minister of State for Home Affairs Pu Nityanand Rai-an Free Movement Regime chungchangah Mizoram leh Mizo mipui te tana tha ber turin ngaihtuahna an hmang ang a ti.
- 2. Ruihhlo thahnem tak man chungchanga inhnamhnawiha puh Aizawl Dinthar Veng-a cheng Henry Lalbiakzingah Chhundeng te in kawtah Dinthar mipui thinrim nizan khan an pungkhawm.
- 3. President Droupadi Murmu-i chuan Portugal-ah ni hnih a cham hnuah tukin khan Slovakia a thleng
- 4. Wawiin atangin Waqf (Amendment) Act,2025 a takin hman tan a ni dawn.

<><><>

UNION MOS HOME

Union Minister of State for Home Affairs Pu Nityanand Rai-an ramri-a inkalpawh theihlohna Free Movement Regime chungchangah Mizoram leh Mizo mipui te tana tha ber turin ngaihtuahna an hmang ang a ti.

Mizoram rawn tlawha lo zin Pu Nityanan Rai a hian nimin khan Aizawl a lo thleng a, tlai lamah Republic Venga BJP State Office ah thuthar thehdarhtute a kawm nghal a, Pu Rai-a chuan FMR chungchangah Pu Modi-a leh Pu Amit Shah ten Mipui tana thaber tur leh mipuite rawn chungin, ram venhimna leh ram tana tha turin thutlukna a siam thin a, FMR chungchangah pawh an siam ngei ang a ti a ni.

Pu Nityanand Rai-a chuan, Prime Minister Narendra Modi chuan ram a kaihhruai hnuah hmarchhak bial tihmawsawn chu a thupui ber a ni a ti a, Look East leh Act East policy te a kalpui a, kum 2014 hma lam nena tehkhinin hmarchhak bial chuan hma a sawn hle a ni ati a.

Railway pawhin Sairang a lo thleng dawn a, zirna leh damdawilam pawhin hma a sawn hle a, Union Home Minister Amit Shah pawh lo kalin, sorkar hotute nen inkawmin, sector hrang hranga hmasawinna turin puih a tiam a ni a ti bawk.

Tun tumah hian Prime Minister Narendra Modi ngen angin Mizorama MADC leh CADC tlawh turin a lo kal a, thawktute hmalakna leh chetvelna a enpui dawn tih a sawi a bawk.

(Corr-Maremi)

<><><>

FMGE&W

Mizorama sorkar hnathawk inzawmkhawm pawl, FMGE&W-in Mizoram Universal Healthcare Scheme (MUHCS) chu a kalphung felfai tawk lo an tih avangin sorkar hnathawkte huam tir rih lo tura sorkar nawr chhunzawm turin thuhtluk an siam.

Federation of Mizoram Government Employees and Workers (FMGE&W) General Conference vawi 33-na nimina Vanapa Hall-a neihah Mizoram Universal Healthcare Scheme (MUHCS) chu a system a la felfai tawk lo an ti a, sorkar hnathawkte huam tir rih lo turin sorkar nawr ni se an ti a, FMGE&W President Pu R. Lalrammawia chuan MUHCS kalpui dan turah fello lai an hmuh tam thu leh sawi vek sen a nih loh thu a sawi a, tunah hian cashless in an kalpui a, private damdawi in ten an pawmpui si lo a, rate mumal a awm lo bawk nen Mizoram sorkar hnathawkte chuan inentirna tur an nei lo a ti a, a hmaa thutlukna an lo siam tawh angin, sorkar hnathawkte huam tir rih lo tura sorkar nawr chhunzawm turin thuhtluk an siam tih a sawi.

Pu Lalrammawia chuan Mizoram sorkar hnuaia thawkte chuan platform hrang hrang atangin beihna an tawk ta nual a, hemi chungchangah sorkar hnathawkte chu insawfiah ve ngai lem lo mahse, tunlai dinhmun thlirin sorkar hnathawk ten Mizoram tana theihtawp chhuaha an hnathawh thinte puan chhuah leh tarlan ve thin chu a tul ve tawh niin a lan thu a sawi a ni.

He inkhawmah hian Mizoram hmun hrang hranga Affiliated Association 99 atanga Rorel Palai 650 vel kalkhawm ten ro an rel a, an thurel zingah Mizoram sawrkar hnuaia hna lak te chu mipui mamawhna zawn thlira Department mamawh ang zelin rualkhai zawka la tur te, Mizoram sawrkar-in a hnuaia thawkte tana Recruitment Rules a siam a service ngai zat chu a pumpui a ennawn tur te leh, Vacancy Based Roster (VBR) chungchang ennawn rawtna te, Central sawrkar hnathawkte DA pun ruala Mizoram sawrkar hnathawkte DA a pun ve zel theih nan hmalak zui zel chungchang te a tel a ni.

Corr: Maremi

<><><>

DINTHAR PROTEST

Ruihhlo thahnem tak Hawng 440 man chungchanga inhnamhnawiha puh Aizawl Dintar Veng-a cheng Henry Lalbiakzinga Chhundeng te in kawtah Dintar mipui thinrim pungkhawmin Vengchhung chhuahsan turin an au rual a, mipui thinrim chuan hun rei tak chhung Vengchhung hruaitute hmalakna an nghah tawh thu sawiin hmalakna a awm mai loh avangin an pungkhawm an ti a, mipui thahnem tak pungkhawm chuan Henry-a chu vengchhung ti mualphotu anih avangin an vengchhunga awm atan an duhlo tih an sawi a ni.

Dintar YMA chuan March ni 15-a Ruihhlo thahnem tak Hawng 440 man chungchanga inhnamhnawiha puh Henry Lalbiakzinga Chhundeng chu Vengchhung atangin an ensan thu sawiin YMA Member an nihna leh Chhiatni Fund an pe kir a ni.

Hetihlai hian, nimin khan Central YMA chuan thuchhuah siamin March ni 15-a Mizoram Police in Ruihhlo thahnem tak Hawng 440 lai leh inhnamhnawiha puh Henry Lalbiakzinga Chhundeng, Dintar, Aizawl ami leh a thurualpuite an man chu lawmawm antih thu an sawi.

Central YMA thuchhuah tarlan danin thalai tam tak ruihhlo bawiha an tan mek laia Ruihhlo hmanga sumdawnna kalpui ani chu an haw takzet an ti a, Henry Lalbiakzinga Chhundeng leh a thurualpuite chu an phu tawk anga dan hmanga hremna an chung a lek ngei anih theuih nan Central YMA chuan a thlir zui reng dawn a ti a, hemi kaihawiha Kulikawn Branch YMA leh Ramhlun North Branch YMA te hmalakna chu an thlawp tih an sawi bawk.

Central YMA chuan ruihhlo hluar zel tur ven nan theihtawp an chhuah tih sawiin Central Anti Drugs Squad (CADS) an din thar leh an ti a, hmun hrang hranga YMA ten mahn huamchhungah tha thlah lova theihtawp chhuah zel turin an chah tih an sawi bawk.

<><><>

YOUTH FEST

Ministry of Tribal Affairs leh Directorate of Social Welfare, Women & Child Development Department hmalakna in National Tribal Youth Festival chu State Tribal Resource Centre, Kelsih-ah nimin tlai khan hman tan a ni.

Ni 4 awh Festival hi Chief Secretary Pu Khilli Ram Meena chuan a hawng a ni.

He festival chhung hian rimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, state thenawm Nagaland leh Manipur atangin artist te an rawn tel a, Zirtawpni bik hi Naupang te pual bika hun buatsaih a ni. Kan corr report lo ngaithla ang.

Voice Cast Mary L. Renthlei

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar puan leh a ni ang.

<><><>

PRESIDENT

President Droupadi Murmu-i chuan Portugal-ah ni hnih a cham hnuah tukin khan Slovakia a thleng. Nimin khan Pi Murmu-i hian Lisbon-a Champalimaud Centre-ah Indian scholar te nen inkawmin India chu ramdang va hneh tum lovin an thinlung zawk hneh a duh tih a sawi a. Portugal-a India mi zirbingna ti a awmte chu ram zahawmna kengtu an nih thu a sawi a ni.

(Byte)

Nimin vek khan President Murmu-i hian Portugal Assembly Speaker Jose Pedro Aguiar-Branco nen an inkawm bawk a ni.

(Newsonair)

<><><>

WAQF

Wawiin atangin Waqf (Amendment) Act,2025 a takin hman tan a ni dawn. President Droupadi Murmu-in he dan hi a pawmpui hnuah sawrkar chuan a taka hman nghal anih tur thu thuchhuah a siam a ni. Kar hmasa khan Parliament chuan he dan hi a pawma. Waqf Board-in ram leh hmunhma an enkawl thinte mumal zawka kalpui a, hmunhlui humhalh leh mipui vantlang tana tangkaia hmanna tur dan a ni.

(Newsonair)

<><><>

DUBAI CROWN PRINCE

Prime Minister Narendra Modia chuan nizan khan Dubai Crown Prince, UAE Deputy Prime Minister leh Minister of Defence Sheikh Hamdan Bin Mohammed Al Maktoum chu New Delhi ah a hmu. Hruaitu pahnihte hian India-UAE thawhdunna hrang hrang tihhmasawn dan turte an sawidun a ni.

Dubai Crown Prince Sheikh Hamdan Bin Mohammed Al Maktoum hian nimin khan ni hnih cham turin New Delhi a lo thleng. Crown Prince hi Union Minister of State Suresh Gopi chuan airport ah a lo dawngsawng a. Tun tum hi Crown Prince of Dubai ni chung a lo zin hmasak ber a ni a. Minister dangte, sawrkar official te leh sumdawng hotuten an rawn zui a ni.

(Newsonair)

<><><>